



MANISNYA IMAN مانيسن ايمان

"SESUINGGUHNYA Allah tidak mengubah apa yang ada pada sesuatu kaum sehingga mereka mengubah apa yang ada pada diri mereka sendiri".  
- Firmān Allah Subhanahu Wata'ala, dalam Surah Ar-Ra'd, ayat 11.

WAKTU SEMBAHYANG IMSAK 4.36 | SUBUH 4.46 | SYURUK 6.06 | DUHA 6.28 | ZUHUR 12.05 | ASAR 3.25 | MAGHRIB 6.02 | ISYAK 7.13 Daerah Belait ditambah 3 minit Daerah Tutong ditambah 1 minit  
TAHUN 67 BILANGAN 132 | 2 NOVEMBER 2022 / 7 ربيع الآخر 1444 | JABATAN PENERANGAN | EDISI RABU / PERCUMA

## MEMPERKUAT JARINGAN AKADEMIK, PENYELIDIKAN



Siaran Akhbar dan Foto : Universiti Islam Sultan Sharif Ali



TENAGA akademik Universiti Islam Sultan Sharif Ali (UNISSA) semasa bergambar ramai pada Persidangan Antarabangsa Islam di Alam Melayu Ke-11 (ICON IMAD XI) 2022 yang berlangsung di Hotel Grand Arsillia, Bandung Indonesia (kiri). Manakala gambar kanan, pembentangan utama yang disampaikan oleh Dekan Fakulti Usuluddin UNISSA, Dr. Hajah Sri Rahayu @ Nurjanah binti Haji Dollah dengan tajuk, 'Kedayatahan Institusi Pengajian Islam mendepani Era Global Endemik : Pra dan Pasca'.

BANDAR SERI BEGAWAN, Selasa, 1 November. - Universiti Islam Sultan Sharif Ali (UNISSA) melalui Fakulti Usuluddin telah bekerjasama dalam penganjuran Persidangan Antarabangsa Islam di Alam Melayu Ke-11 (ICON IMAD XI) 2022 yang berlangsung di Hotel Grand Arsillia, Bandung Indonesia, baru-baru ini.

Persidangan ini melibatkan penganjuran bersama empat buah institusi pengajian tinggi di Asia Tenggara secara bergilir iaitu Akademi Pengajian Islam Universiti Malaya, Malaysia; Fakulti Usuluddin, UNISSA, Negara Brunei Darussalam (NBD); University Prince Songkla, Thailand dan Pascasarjana UIN Sunan Gunung Djati (UIN SGD), Bandung, Indonesia selaku tuan rumah pada tahun ini.

Seramai tujuh orang wakil

UNISSA telah membentangkan kertas kerja semasa persidangan secara fizikal terdiri daripada Profesor Madya Dr. Anis Malik Thoha, Dr. Hajah Masuriyati binti Haji Yahya, Dr. Ahmad Baha bin Haji Mokhtar, Dr. Zakir bin Hussain, Dr. Mariam binti Abd. Rahman dan Dr. Hafini bin Mahmud, di samping pembentangan utama yang telah disampaikan oleh Dekan Fakulti Usuluddin UNISSA, Dr. Hajah Sri Rahayu @ Nurjanah binti Haji Dollah dengan tajuk, 'Kedayatahan Institusi Pengajian Islam mendepani Era Global Endemik : Pra dan Pasca'.

ICON IMAD kali ini telah berjaya mengumpulkan sebanyak lebih 160 kertas kerja yang dibentangkan secara bersemuka dan dalam talian dengan penyertaan 20 buah Institusi

pengajian tinggi daripada Malaysia, Indonesia, Thailand dan juga NBD. Persidangan pada tahun ini telah mengangkat tema 'Peradaban Melayu Mendepani Cabaran Global COVID-19'.

Antara objektif seminar ialah memperkuatkan jaringan akademik dan penyelidikan semasa serta membuka lebih banyak ruang dan peluang kerjasama daripada pelbagai aspek khususnya dalam penyelidikan antara negara-negara nusantara.

Di samping berkongsi hasil penyelidikan, persidangan juga menjadi platform untuk menjalin hubungan strategik bersama rakan-rakan daripada IPT luar dalam sama-sama memperkasa kebudayaan keilmuan yang akan membangun tamadun Islam di dunia Melayu.

Pada hari penutupan majlis, ICON IMAD 2022 turut mengadakan acara menandatangani Memorandum Persetujuan (MoA) antara perwakilan pihak penganjur dari empat buah negara sebagai memperkukuh lagi usaha jalinan kerjasama yang sedia ada khususnya dalam pelaksanaan persidangan ini.

Di samping hadir selaku pembentang, lawatan muhibah ke

beberapa institusi termasuk Majlis Ulama Indonesia (MUI), Institute for Study of Islamic Thought and Civilization (INSISTS), Universitas Islam Bandung (UNISBA), Darut Tauhid (DT) Persatuan Islam (PERSIS) dan UIN Sunan Gunung Djati, Bandung turut diadakan oleh tujuh orang pembentang UNISSA yang diharap dapat melebarkan bidang kerjasama antara institusi.